


Edukasyon sa Pagpapakatao

Unang Markahan – Modyul 3: Paggamit ng Impormasyon





Alamin

Ang modyul na ito ay magtuturo sa iyo ng tamang paraan sa paggamit ng mga impormasyong nakukuha mo sa radyo, telebisyon, **internet** at **social media**. Masusuri at maipapaliwanag mo rin ang mabuti at di-mabuting dulot ng impormasyong nakukuha mo rito. Sa bandang huli matutuhan mo ang sagot sa tanong na ito: Paano gagamitin nang tama ang mga impormasyon na naririnig at nababasa?

Sa modyul na ito inaasahang malinang ang sumusunod na kaalaman, kakayahan, at pag-unawa:

1. Natutukoy ang tamang hakbang sa paggamit ng impormasyong may kinalaman sa pangyayari na makukuha sa radyo, telebisyon, at social media.
2. Nasusuri ang mga impormasyong nakukuha o naririnig sa radyo, telebisyon, o social media.
3. Naisasagawa ang tamang paggamit ng impormasyong nakukuha sa radyo, telebisyon, o social media.
4. Napahahalagahan ang tamang paggamit ng impormasyon na nabasa o narinig.



Subukin

- A. Panuto: Lagyan ng tsek (✓) ang bilang kung wastong hakbang ang ginagawa at ekis (✗) kung hindi. Isulat ang iyong sagot sa kuwaderno.
1. Si Mang Nicanor ay isang Barangay Opisyal. Nakatanggap siya ng **e-mail** na magkakaroon ng pagpupulong ang lahat ng opisyaes ng Barangay. Tiningnan niya ang pangalan ng nagpadala mula ito sa kalihim.
 2. Nasa ika-anim na baitang si Josie. Handa na siyang pumasok sa paaralan ngunit napakalakas ng ulan. Narinig niya sa radyo na kinansila ng kanilang Mayor ang pasok sa elementarya at sekondarya dahil sa masamang kalagayan ng panahon. Tinawagan ni Josie ang kanilang paaralan upang eberipika ang narinig.
 3. Nanonood ka ng telebisyon at nakita mo sa kanilang palabas na may makapal na usok malapit sa inyong lugar. Sinabi mo agad sa iyong ina na mayroong sunog malapit sa inyo. Nabigla siya at hinimatay dahil sa nerbiyos. Nalaman mo mula sa inyong kapitbahay na nagpa-**fogging** lamang pala sa inyong Barangay.
 4. Nakatanggap ka ng mensahe mula sa kaibigan mo na naiinis ang isa mong kaklase sa iyo dahil sa palagi mong pagkuha ng matataas na marka. Hindi ka naniwala sa kaniya dahil wala kang basihan nito.
 5. Nakita mo sa iyong **facebook account** na may isang babaeng nanawagan kung sino ang nakakikilala sa matandang palaboy-laboy sa kanilang lugar at hinahanap ang kaniyang pamilya. Nagkataon na kilala mo ang matanda at malapit lamang ang tirahan nila sa inyo kaya pinuntahan mo agad ang kaniyang pamilya at ipinaalam ang kinaroronan ng matanda.

- B. Panuto: Sa iyong kuwaderno isulat ang **TAMA** kung ang pangyayari o sitwasyon ay nagsasaad ng tamang hakbang sa pagpapasya at **MALI** kung hindi.
1. May pagpupulong ang inyong samahan sa EsP at napagpasyahan ng marami na sasama sa **Clean Up Drive** ng paaralan. Hindi ka sumama dahil tinatamad ka.
 2. Hindi ka sumunod sa iminungkahi ng iyong lider sa pangkat na magdala ng matulis na bagay para madaling pumutok ang lobo sa inyong laro sa paaralan.
 3. Napagpasyahan ng SPG na maglunsad ng isang proyekto na makatutulong sa paaralan. Isa ka sa napili ng nakararami na maging lider. Labag sa kalooban mo na tinangap ang iyong pagkalider.
 4. May nabasa kang isang pribadong mensahe mula sa isang kaibigan na nagsasabi ng masama laban sa iyo. Nagalit ka kaagad kahit hindi mo alam ano ang pinagmulan nito.
 5. Napansin mo na ang iyong kaibigan na nakaupo sa harapan mo ay nangongopya ng sagot sa katabi nya ngunit ito ay binalewala mo at ikaw ay nagbulagbulagan lamang.
 6. Nagkasundo kayong magkaibigan na magsaliksik sa aklatan. Sa araw na napagkasunduan, tumanggi ka at nanood ng sine.
 7. May usapan kayong dadalo sa pulong ng kampanyang **“No to Drugs”** sa Barangay Hall. Hindi ka sumama dahil natapat ito sa sinusubaybayan mong Telenovela.
 8. Ang buong klase ay nagkasundong magsagawa ng pag-aaral sa Laguna Ecocentrum. Nakarating kana roon, subalit sumama ka pa rin.
 9. Galing sa mahirap na pamilya si Nicholas. Matalino siya kaya pinapag-aral siya ng pamahalaan. Nang makatapos bilang iskolar sa pagiging doctor nagdesisyon siya na magtatrabaho sa Amerika dahil mas malaki ang suweldo roon.
 10. Si Luisa ay isang dalagang hindi nakapagtapos ng pag-aaral dahil sa barkada. Lagi siyang pinagsasabihan at pinagagalitan ng kaniyang mga magulang. Gusto na lang ni Luisa na mag-asawa kahit walang trabaho ang lalaki para lang siya makaalis sa kanila.

Aralin

1

Paggamit ng Impormasyon

Sa panahon ngayon marami tayong mapagkukunan na iba't ibang impormasyon tungkol sa mga nagaganap sa ating lugar/lokal o maging internasyonal man. Kailangan nating maging maagap upang mulat tayo sa mga pangyayari sa ating paligid.

Maraming makabagong teknolohiya ang maaaring magamit sa pagkuha ng mga impormasyon na nangyayari saan mang sulok ng mundo. Ang radyo, telebisyon, social media - **twitter, facebook; internert - google, Wikipedia** ay ilan sa mga mapagkukunan ng impormasyon.



Balikan

Panuto: Basahin ang sumusunod na sitwasyon at tukuyin kung ano ang tamang hakbang na dapat gawin. Isulat ang titik ng napiling sagot sa iyong kuwaderno.

1. Pumunta ka sa isang aklatang-bayan. Hinihingi ang impormasyon ng iyong tirahan.
 - A. Ibibigay mo ang **address** ng iyong paaralan.
 - B. Ibibigay mo ang kumpletong address ayon sa hinihingi.
 - C. Ibibigay mo ang buong pangalan ng tatay at nanay mo.
 - D. Alamin muna bakit hinihingi.
2. May dumating sa bahay ninyo na bagong katulong o kasambahay. Gabi na at bukas pa uuwi ang mga magulang ninyo.
 - A. Patuluyin mo siya at patulugin sa gabi.
 - B. Hayaan mo siyang maghintay sa labas ng bahay.
 - C. Ipagbibigay alam sa kaniya na ang mga magulang mo ay umalis pa at uuwi ang mga ito kinabukasan.
 - D. Pabalikin siya kinabukasan.
3. May dumating, nagpapakilalang kolektor ng **appliances**. Wala sa bahay ang nanay at tatay mo. Hinihingi niya ang **cellphone number** ng mga magulang mo. Ano ang gagawin mo?
 - A. Hindi papasukin ang tao at tawagan ang iyong ina sa cellphone.
 - B. Papasukin ang tao sa bahay at papaghintayin sa tawag ng iyong ina.
 - C. Humingi ng opinyon ng kapitbahay kung papasukin ang tao.
 - D. Isara ang pinto at hayaang maghintay ang tao sa labas.

4. May isang **van** na huminto sa tapat ng bahay ninyo. Lumabas ang isang lalaki at nagbalitang naaksidente ang kapatid mo at kasalukuyang nasa ospital. Nasa trabaho pa ang mga magulang mo. Ano ang gagawin mo?
- A. Ipagbibigay alam at hihikayatin ang mga kaibigan na sumama ospital.
 - B. Ikaw na lang ang sasama sa ospital.
 - C. Ipaaalam sa mga magulang ang nangyari at hintayin ang kanilang desisyon.
 - D. Magtatanong sa kapitbahay ano ang gagawin.
5. Lilipat ka ng papasukang paaralan. Kakailanganin ang mga impormasyon ng pamilya mo sa iyong mga sasagutin. Alin sa sumusunod ang hindi kasama?
- A. Buong pangalan ng tatay at pinagta-trabahuhan niya.
 - B. Pangalan ng nanay mo sa pagkadalaga.
 - C. Iyong mga kaibigan at nakaraang mga kaklase.
 - D. Edad at pangalan ng iyong mga kapatid.
6. Nakita mo sa facebook na kinansila ang pasok dahil sa malakas na hangin at pabugso-bugsong ulan.
- A. Maniwala at huwag ng pumasok.
 - B. Sasabihin sa ina na walang pasok dahil sinabi ito ng iyong kaklase.
 - C. Itanong sa guro kung totoo ang impormasyong iyong nabasa.
 - D. Alamin sa mga kaibigan kung totoo na walang pasok.
7. Nag-**chat** ang kaibigan mo tungkol sa programa para sa Buwan ng Wika. Nagtatanong siya kung ano ang isusuot sa palatuntunan. Ano ang gagawin mo?
- A. Isusumbong siya sa guro dahil hindi siya nakinig.
 - B. Hayaan na makadalo sa palatuntunan ng paaralan na walang dala.
 - C. Ipagbigay alam sa kaibigan ang mga palabas at kung ano ang dapat.
 - D. Ibigay agad sa kaniya ang lahat ng impormasyong nalalaman tungkol sa programa sa Buwan ng Wika.
8. May umugong na balita na may naganap na nakawan sa Barangay. Isang araw, kumatok sa pinto ang isang lalaki at sinasabing kaibigan siya ng kaniyang mga magulang. Pinapasok naman siya ng bata sa kanilang bahay kaya malayang nakapagnakaw ang kawatan. Kung ikaw ang bata, ano ang iyong gagawin?
- A. Hindi papasukin ang tao at tatawagan ang iyong ina upang itanong kung totoong kaibigan siya.
 - B. Papasukin ang tao sa bahay at pahihintayin sa iyong ina.
 - C. Humingi ng opinyon ng kapitbahay kung papasukin ang tao.
 - D. Isara ang pinto at hayaang maghintay ang tao sa labas.

9. Una mong nabasa sa inyong **group chat** na mayroong Clean-Up Drive sa inyong paaralan upang maiwasan ang pagbara ng estero at makaiwas sa sakit na **dengue**. Batid mong hindi pa ito alam ng iyong mga kaklase at kaibigan. Ano ang gagawin mo?
- A. Ipagbibigay alam at hihikayatin ang mga kaibigan mo na sumama sa Clean-Up Drive.
 - B. Ikaw na lamang ang sasama sa Clean-Up Drive
 - C. Ipaaalam sa mga kaklase kung tapos na ang Clean-Up Drive dahil marami pa namang pagkakataon.
 - D. Wala ang sagot sa mga nabanggit.
10. Nalaman mo sa isang pagsaliksik sa social media na ang palagiang paglalaro ng **mobile legend** ay nakakasama. Alam mo na ang iyong kapatid na lalaki ay palaging naglalaro nito. Ang gagawin mo ay...
- A. Sabihin na iwasan ang palagiang paglaro ng mobile legend dahil may masamang epekto ito.
 - B. Sasabihin sa magulang ang iyong natuklasan.
 - C. Hahayaan ang kapatid.
 - D. Pagagalitan ang kapatid.


Mga Tala para sa Guro

Katungkulan mong tiyakin na ang bawat mag-aaral ay mabibigyan ng sapat na suporta at alalay mula sa kanilang magulang, nakatatandang kapatid sa bahay o kahit na sa mga kamag-anak, kaibigan at kapitbahay.



Tuklasin

Magandang araw! Inaasahan sa modyul na ito na ikaw ay makatutukoy, makasusuri, makagagawa, at makapagpapaliwanag ng mga tamang hakbang sa paggamit ng impormasyon upang hindi makasakit at makapaminsala sa sarili at sa kapuwa.



1. Tandaan na ang social media at ang internet ay itinuturing na isang publikong lugar

Anumang bagay na i-post natin sa social media at sa internet ay naisasapubliko. Ang isang post ay maaring mabasa ng daan-daan nating mga kaibigan at kakilala. Maari rin itong mai-**share** at umabot sa libu-libo, o maging milyun-milyong naka-konekta sa internet.

Kaya dapat tayong maging maingat sa lahat nang ating mga pananalita, ekspresyon, at maging sa mga larawan na ginagamit. Tandaan na maaaring mabasa at bigyan ng kahulugan ito ng kung sino-sino at samut-saring uri ng tao. Tandaan din natin na kung ano ang ating naging reputasyon **online**, ganun din ang magiging pagkilala sa atin sa tunay na buhay.

Hanggat maaari, iwasang mag-post ng masyadong pribadong mga usapin o paksa, maseselang larawan, at **video**. Huwag mag-post ng maaring makasakit o makagalit sa ibang tao.

2. Ang social media ay lugar para sa pagkakaibigan at pagkakaunawaan

Ang social media ay nilikha upang paigtingin ang koneksyon sa ating mga mahal sa buhay at mga kaibigan sa pamayanan at sa kabuuan ng lipunan. Ang Facebook, Twitter, Instagram, at iba pa, ay lugar para sa pagkakaibigan at pagkakaunawaan.

Maaring dumating minsan ang punto na magkasalungat ang ating mga pananaw sa iba't ibang mga bagay subalit tandaan natin na karapatan ng bawat isa ang magpahayag ng paniniwala at saloobin. Hindi ito masama. Mas mainam nga na naipahahayag natin ang ating mga kuro-kuro. Importante lang na manaig ang respeto sa mga pagkakaiba-iba natin.

3. Ugaliing basahin nang buo at maigi ang nilalaman ng artikulo bago magkomento o mag-share

Tandaan natin na importante ang pagbabasa at pag-unawa nang lubusan sa mga bagay na nakikita natin sa internet. (Babala: hindi lahat ng nakikita sa internet ay totoo!)

Narito ang ilang mga gabay na tanong upang mas maunawaan natin ang ating mga binabasa:

- Ano ang pangunahing paksa ng artikulo na ito? (Tungkol saan ang artikulo na ito?)
- Ano ang mga sumusuportang ideya sa pangunahing paksang ito?
- Ano ang gustong ipahiwatig ng manunulat/potograpo/may-akda ng gawang ito?
- Lahat ba ng mga naisulat/ipinapakita/nailathala ay suportado ng siyentipikong pagsusuri, ebidensya, at patunay?
- Pantay ba sa lahat ng panig ang mga anggulo ng akda o artikulo na ito?
- Maari ko bang beripikahin at isangguni sa iba pang mga sanggunian ang mga sinasabi at inaangkin ng awtor sa artikulo na ito? Sumosoporta ba sa pag-aangkin na ito ang iba pang mga sanggunian o salungat ang mga ito?
- Itong akda/imahe/video ba ay diretsong pagpahayag ng katotohanan/kaganapan)? O ito ba ay pagpapahayag lamang ng may akda ng kaniyang sariling opinyon?
- Paano ito makaka-apekto sa akin at sa aking pang-araw-araw na pamumuhay?
- Ano ang ibig sabihin ng artikulo na ito sa mga bagay-bagay na kasalukuyang nangyayari sa ating lipunan?

Kapag hindi lubusang naintindihan ang nababasa o nakikitang mga imahe, mas mainam na magtanong sa nakaka-alam, o mga eksperto sa paksa. Magtanong sa mga kaibigan, kamag-anak, guro, o mga otoridad na may mas malawak na kaalaman sa paksa ng inilathala o litrato.

4. Iwasang mag-share ng hindi beripikadong mga artikulo o memes

Karugtong ng nasa kabilang pahina, tandaan natin na importanteng totoo at beripikado ang mga impormasyon na ating sine-share sa social media. Alamin kung totoo at batay lamang sa katotohanan ang nilalaman ng artikulo at mga larawan.

May mga artikulong nais lamang magbigay ng komentaryo sa pamamagitan ng pagpapatawa. Ang tawag sa mga ito ay **lampoon**, **parody**, o **satire**. Maging maingat sa pagkilala at pagbasa ng mga ito.

Tandaan natin na may iba pang mga **websites** na ang tanging pakay lamang ay manlinlang at magpakalat ng hindi totooang mga impormasyon. Iwasan natin ang mga ito.

Maaaring sa pag-share natin ng maling impormasyon ay makasakit tayo ng ibang tao, maging dahilan ng **panic**, o di kaya'y maging sanhi ng kaguluhan sa ating lipunan. Ayaw nating mangyari ito.

5. Maging responsable sa lahat nang oras

Ang pagiging responsable online ay nag-uugat sa dalawang bagay lamang: katotohanan at paggalang.

Kung ang bawat isa sa atin ay responsable sa ating pag-aasal sa social media, maiiwasan natin ang bangayan, hindi pagkaka-unawaan, siraan, at pagkakawatakwatak.

Gamitin natin ang social media nang tama. Gamitin natin ito upang linangin ang ating pakikipag-kapuwang tao. Gamitin natin ito upang tayo ay matuto. Gamitin natin ang Facebook, Twitter, at Instagram upang mas mapabuti pa ang ating pamumuhay.

Ngunit may masama at mabuting dulot sa bawat paggamit natin o pagpapalabas ng mga impormasyon at personal nating pagkakilanlan sa social media. Paano nga ba natin gagamitin ang mga impormasyong nakukuha natin tungkol sa mga pangyayaring narinig o nabasa dito?

Mabuting Naidudulot:

Nabibigyan ng magandang pagkakataon ang mga mag-aaral upang lalo pang malinang ang kanilang pagkamalikhain o pagkamakasining at patuloy na pagkakaroon ng mga makabagong ideya. Ang mga kakayahan o talento ng bawat isa ay matutuklasan, halimbawa kung ang isang tao ay magaling umawit, maaari siyang matuklasan nang mas madali sa pamamagitan ng videos. Maaari ring gamitin ang Google, isang website upang makapanaliksik ng tungkol sa iba't ibang aralin. At ang mga saloobin ng bawat isa ay madaling naipahahayag. Ilan sa mga mabubuting epekto ay ang madaling mapalaganap ang mga kaalaman o mga impormasyon at mabilis na pakikipag-ugnayan ng mga tao.

Masamang Naidudulot:

- Unang-una, hindi mo personal na nakakausap ang isang tao sa social media sapagkat kayo ay nag-uusap sa pamamagitan ng **screen** lamang.
- Nawawala din ang pagkakataon na mas matuto pa halimbawa sa mga detalye ng tamang pagbigkas at gramatika ng mga salita at pangungusap.
- Higit sa lahat ay nagiging sanhi ang social media ng paggamit ng mahabang oras - maaring sa laro at pakikipag-usap ng isang mag-aaral na magsisilbing dahilan upang maapektuhan at mapabayaang ang pag-aaral.

Ayon sa mga eksperto, nakaka-apekto ang madalas na internet access sa kalusugan ng ating utak. Nagdudulot ito ng **sleep deprivation** o dahilan upang hindi tayo makatulog sa gabi. Sa kabilang banda, nagiging dahilan din ito sa pagkakaroon natin ng maikling pasensiya o pokus sa isang bagay.

Ayon sa artikulo ng Forbes, ang matagalang paggamit ng internet ay nakapagdudulot ng adiksiyon. Naka-aapekto ito sa personal na pakikipagtalastasan o sa relasyon natin sa ating mahal sa buhay dahil maraming oras ang nasasayang dahil na nga halimbawa sa paggamit ng social media.

Masaya man o nakapagdudulot ng aliw ang araw-araw na pag-access sa internet, hindi pa rin maganda na maubos ang oras dito. Higit sa lahat, mas maigi pa rin ang personal na pakikisalamuha sa kapuwa dahil daan ito upang mas higit na makilala at makita ang tunay na emosyon, ugali at kilos ng isang tao.

Ang mga impormasyon na nakukuha natin sa radyo, telebisyon, internet, at social media ay nakasalalay sa atin kung paano ito gagamitin. Ang responsabling paraan ng paggamit ng ano mang impormasyon ang makaiiwas na makasakit o makapinsala sa sarili at sa kapuwa.



Suriin

- A. Panuto: Sipiin sa iyong kuwaderno ang nagsasaad ng tamang gabay sa paggamit ng impormasyon.

Ang social media ay pampubliko at ang pagkakilala sa atin dito ay tulad na rin sa pagkilala sa atin sa personal

Ugaliing basahin nang buo at maigi ang nilalaman ng artikulo bago magkomento o mag-share.

Pagpapakalat ng impormasyong hindi kapani-paniwala

Ang social media ay para sa pagkakaibigan at pagkakaunawaan

Pagpapalitan ng hindi kanais-nais na salita

Panonood ng mga videos na ipinaghihigpit o ipinagbabawal


Pag-post ng personal at pansariling pagkakilanlan


Pagiging responsable sa paggamit ng impormasyon


Iwasang mag-post o mag-share ng mga impormasyong di beripikado

Paggawa ng pekeng account

B. Panuto: Gawin ang **word web** gaya ng nasa ibaba sa iyong kuwaderno, Isulat dito ang mabuti at masamang epekto ng social media.








Pagyamanin

Panuto: Basahin ang talata at sagutin ang mga tanong.



Isang umaga, habang umiinom ng kape si Mang Edwin nakikinig siya ng balita sa radyo. Ito ang kaniyang napakinggan. “Ayon sa PAGASA, isang napakalakas na bagyo ang paparating sa Pilipinas. Sakop nito ang buong bansa na may pabugso-bugsong lakas ng hangin na 235 km/hr. at may malakas na buhos ng ulan. Ang napakalakas na bagyong ito ay inaasahang papasok sa bansa sa susunod na tatlong araw. Pinag-iingat ang lahat lalo na ang mga mandaragat sa malalakas at matataas na alon. Maghanda ang madla ng mga pangangailangan tulad ng **flashlight**, pagkain at mga gamot.”

Naalarma si Mang Edwin sa kaniyang narinig na balita. Humingi siya ng tulong sa kaniyang asawa na si Aling Lita. Ipinagbigay alam nila ito sa kanilang mga kapitbahay at Barangay upang makapaghanda. Ang balitang ito ay sinuri ng Punong Barangay kung totoo at na kumpirma niya ito sa PAGASA. Ang lahat sa kanilang barangay ay nagtulong tulong sa pag-ayos ng bubungan at paglalagay ng banting sa kanilang bahay upang hindi masira o madala ng ipo-ipo at malalakas hangin.

Gawin: Isulat ang sagot sa iyong kuwaderno.

1. Ayon sa talata na iyong nabasa, paaano naiparating ang impormasyon?
2. Paano sinuri ang impormasyong narinig?
3. Katulad din ba sa kaniya ang iyong gagawin? Bakit?

Tandaan:

Suriin nang mabuti ang mga impormasyong tungkol sa mga pangyayari kung ito ay kapani-paniwala, maaasahan, o napapanahon.

Maging responsable tayo sa paggamit, pagbahagi, o pagbibigay ng impormasyong nakukuha sa radyo, telebisyon, internet at social media.



Isaisip

Paano mo nagagamit nang wasto ang mga impormasyong nakukuha mo sa radyo, telebisyon, internet, at social media?

Panuto: Sumulat ng limang hakbang sa tamang paggamit ng impormasyon na makukuha sa radyo, telebisyon, at social media. Itala sa iyong kuwaderno.

1. _____
2. _____
3. _____
4. _____
5. _____

Panuto Sipiin sa iyong kuwaderno ang sumusunod. Lagyan ng tsek (☐) ang kolum ng iyong sagot kung gaano mo kadalas ginagawa ang isinasaad sa bawat bilang.

		MADALAS	MINSAN	HINDI
1.	Responsible ako sa pagbabahagi ng impormasyong aking naririnig.			
2.	Sinusuri ko ang mga impormasyong aking nakukuha.			
3.	Sinisigurado kong totoo ang impormasyong bago ko ito gamitin o ibahagi.			
4.	Inaalam ko kung maaasahan ba ang pinagkunan ko ng impormasyong aking ginagamit.			
5.	Ibinabahagi ko agad ang mga impormasyong nakatutulong sa aking kapuwa at binabalewala kung walang kabuluhan ang mga ito.			



Isagawa

Panuto: Basahin ang sumusunod na sitwasyon at tukuyin kung ano ang tamang hakbang na gawin. Isulat ang titik ng napiling sagot sa iyong kuwaderno.

1. Tinatanong ka ng principal ng pangalan ng mga magulang mo.
 - A. Isusulat mo sa papel ang mga pangalan nila.
 - B. Sasabihin mo ang buong pangalan ng mga magulang mo.
 - C. Itanong muna sa guro kung ano ang gagawin mo.
 - D. Alamin sa mga kaibigan kung ano ang ginawa nila.

2. Sa **application form** kailangan mong isulat ang petsa ng kapanganakan ng nanay mo.
 - A. Tatanungin mo ang kuya mo kung sasagutin ito.
 - B. Sasagutin at isusulat mo ang petsa.
 - C. Mamaliin ang petsa.
 - D. Laktawan ang tanong sa application form.

3. May **census enumerator** ng Barangay na dumating sa bahay ninyo. Hinihingi niya ang cellphone number ng tatay mo. Ano ang gagawin mo?
 - A. Ibigay mo dahil saulado mo ito.
 - B. Papasukin ang tao sa bahay at pahintayin sa iyong tatay.
 - C. Humingi ng opinyon ng kapitbahay kung papasukin ang tao.
 - D. Isara ang pinto at hayaang maghintay ang tao sa labas.

4. Tumawag ang Tatay mo galing sa ibang bansa. Hinihingi niya ang **ATM number** ng nanay. Magpapadala siya ng pera. Ano ang gagawin mo?
 - A. Ibibigay mo ang numero dahil saulado mo na ito at wastuhin mo pagkatapos.
 - B. Paghintayin ang tatay sa pag-uwi ng nanay galing palengke.
 - C. Itanong sa kapatid ang tamang numero.
 - D. Wala ang sagot sa mga nabanggit.


5. Inaalam ng taong ka-chat mo ang pagkakakilanlan mo. Alin sa mga ito ang dapat mong ilihim sa kaniya?
 - A. Buong pangalan mo
 - B. Tirahan at edad mo
 - C. PIN ng ATM mo
 - D. Pangalan ng mga miyembro ng pamilya mo



Tayahin

Panuto: Isulat sa iyong kuwaderno ang (✓) kung wastong hakbang ang ginagawa at ekis (x) kung hindi.

1. Si Mang Andoy ay matagal nang nagtatrabaho sa Munisipyo. Siya ay kinagigiliwan ng lahat sapagkat taos-puso niyang ginagampanan ang kaniyang tungkulin. Dahil dito, hinihingi ng Mayor ang pangalan ng kaniyang anak upang gawing **scholar** ng bayan. Isinulat niya ang palayaw ng anak sa kontratang papel.
2. Nasa ika-anim na baitang si Nilo. Handa na siyang pumasok sa mataas na paaralan sa susunod na pasukan. Maagang nanghihingi ng lista ng mga mag-aaral ang Mataas na Paaralan ng San Jose. Hinihingi ang mga impormasyong nauukol sa kaniyang sariling pamilya. Nasagot niya lahat ang mga ito.
3. Ang Munisipyo ay naglalaan ng pundo para sa kabataan. Sa bakasyon, may dalawampung araw na pagtatrabaho ang ilalaan sa paglilinis ng kalsada, mga parke, at iba pang pampublikong lugar. Tinatawag itong **summer job**. Gusto mong mag-apply. Hinihingi sa aplikasyon ang petsa ng kapanganakan ng inyong mga magulang. Hindi mo alam ang tamang petsa. Sinagutan mo ng mga petsang hula mo lang.
4. Nakatanggap ka ng mensahe mula sa kaibigan mo. Gusto niyang lumabas ka ng bahay upang makita ang tatay mo at ang kinakatagpo niya na sinasabing babae raw ng tatay mo. Hindi ka naniwala sa kaniya dahil wala kang sapat na basihan nito.
5. Nabalitaan mo sa iyong facebook account na may isang matandang babae na palaboy-laboy. Nalaman mo na ang nasabing matanda ay ang ina ng tatay mo. Pinuntahan mo kaagad ang matanda at pinagalitan siya.



Karagdagang Gawain

Panuto: Isulat sa iyong kuwaderno ang tsek (✓) kung wasto ang hakbang na ginawa at ang ekis (x) kung hindi.

1. Si Mang Ernie ay may mga kaibigan. Ilan sa kanila ay nagtatrabaho sa ibang bansa. Ibinibigay niya sa mga ito ang cellphone number at e-mail address niya.
2. Nagkasakit ang siyamnapung taong gulang na lola ni Efren. Tinatanong ng nars ng hospital ang **PhilHealth number** ng nanay niya. Ibinibigay niya ito.
3. Nagbakasyon ang buong pamilya sa Baguio. May nakilala kang isang mestiso. Tinulungan ka niyang maghanap ng bangko na pagkukunan mo ng pera. Ibinigay mo ang PIN ng ATM mo para mapadali ang pag-**withdraw**.
4. Gusto mong magkaroon ng bagong **gadget**. Kumuha ka ng hulugang **laptop**. Sa application form isinulat mo ang buong direksiyon ng tirahan mo.
5. Nabasa mo sa iyong facebook account na may isang babaeng nanawagan kung sino ang nakakilala sa matandang palaboy-laboy sa kanilang lugar at hinahanap ang kaniyang pamilya. Nakita mo ang mukha ng matanda. Pinaalam mo sa kapitbahay mo na ang lola nila ay nakita sa facebook na matagal na nilang hinahanap.



Susi sa Pagwawasto

	Karagdagang Gawain 1. ✓ 2. ✓ 3. x 4. ✓ 5. ✓	Tayahin 1. ✓ 2. ✓ 3. x 4. ✓ 5. x
Isagawa 1. B 2. A 3. C 4. B 5. C	Balikan 1. B 2. D 3. A 4. C 5. D 6. C 7. D 8. A 9. A 10. B	Subukin A 1. ✓ 2. ✓ 3. x 4. ✓ 5. ✓ B 1. MALI 2. TAMA 3. TAMA 4. TAMA 5. TAMA 6. TAMA 7. TAMA 8. MALI 9. TAMA 10. TAMA